

Un meta grandi di Artistar ta pa produci suficiente musico pa futuro



ORANJESTAD(AAN): Fundacion Artistar ta organizando un asina yama Pop-Fest, unda cu hobennan ta bay competi contra otro den un anochi di canto riba Diasabra dia 10 di Augustus den Excess Ballroom na Paseo Herencia. Durante un conferencia di prensa, presidente di e fundacion Bertha Yvonne Wolff-Croes a splica cu esaki ta bay ta un actividad bunita

pa nos hobennan.

“Nos kier desea tur nos participantenan hopi exito, pasobra nan ta bay duna e publico presente un sorpresa grandi, demostrando nan talento”.

“Nos ta bay demostra na tur hende cu Aruba tin talento”, segun e presidente di e fundacion.

El a sigui bisa cu Fundacion Artistar ta demostra na Aruba nan seriedad pa cumpli cu e talento di nos hobennan na Aruba.

“Nos hobennan mester di atencion pa nan talento, tanto den canto y baile, como tambe den arte visual”.

“Esey ta e meta grandi y di awor caba nos ta anuncia cu esaki ta e comienzo di organiza actividadnan manera esaki pa nos hobennan”.

Esaki segun señora

Wolff-Croes, kende a sigui bisa cu otro aña ta bay organiza Pop-Fest y Pop-Art.

Pop-Art ta pa e hobennan demostra nan talento den baile of den grupo y tambe den teatro y arte visual.

For di 11 di Augustus caba ta bay cuminsa cu e preparacionnan pa esaki.

Un meta importante di Artistar ta pa produci musico, pasobra Aruba su musiconan ta birando grandi y tin un tiki scarcedad di musica bao di nos hobennan, segun presidente di e fundacion. “Ta importante pa nos hobennan por ehempel siña domina diferente instrumento, pa den futuro tin suficiente musico pa entretene pueblo di Aruba, como tambe nos bishitantenan”, segun Wolff-Croes.

